

समे — 12:25

<><><><><><>

JK Assembly proceedings

जम्मू-कश्मीर विधानसभा च अज्ज उप्परोतली त्रीये ध्याडे बी डंड-रौली ते हंगामा बरोबर जारी रेया। जम्मू-कश्मीर दा विशेष दर्जा ब्हाल करने लेई पास कीते गेदे प्रस्ताव दे बरोध च बीजेपी दे विधायकें बरोध प्रदर्शन कीता जिस करी स्पीकर होरें बरोधी धड़े दे 12 विधायकें ते लंगेट दे विधायक शेख खुर्शीद गी मार्शलें दी मदाद कन्नै सदन थमां बाहर भेजी दित्ता। आकाशवाणी दे जम्मू संवाददाता मूजब, अज्ज सदन दी कार्रवाई जि'आं गै शुरु होई तां बीजेपी दे विधायक सदन दे बिच्चो-बिच्च आई गे ते उनें नारेबाजी शुरु करी दित्ती जेहदे करी स्पीकर अब्दुल रहीम राथर होरें मार्शलें गी निर्देश दित्ता जे हंगामा करै करदे विधायकें गी सदन थमां बाहर कड्डेआ जा। इनें विधायकें गी मार्शल आउट कीते जाने दे मगरा बीजेपी दे बाकी दे विधायकें बी सदन थमां वॉकआउट करी दित्ता।

<><><><><><>

Sopore Terrorist Killed

बारामूला जिले दे सोपोर इलाके च सुरक्षाबलें कन्नै होए दे टाक्करे च द'ऊं आतंकवादी मारे गे न। कश्मीर जोन पुलस दे प्रवक्ता नै जानकारी दित्ती ऐ जे जिले च सोपोर दे पानीपोरा इलाके च आतंकवादिएं दी मजूदगी बारै पक्की सूह थोने परैन्त सुरक्षाबलें आसेआ जंदी रातीं सांझे तौर उप्पर आतंकवाद-रोधी अभियान चलाया गेआ। सुरक्षाबलें दे जवान जि'आं गै संदिग्ध थाहरै कश पुज्जे तां उत्थे छप्पे दे आतंकवादिएं उंदे पर फायर खोली दित्ता जेहदा सुरक्षाबलें बी बनकदा परता दित्ता ते टाक्करा शुरु होई गेआ। मारे गेदे आतंकवादिएं दी पन्छान अजें कीती जा करदी ऐ। टाक्करे आहली थाहरै थमां थेहार-असलाह ते गोला-बरुद सने होर बी समेयान बरामद कीता गेआ ऐ।

<><><><><><>

Kishtwar VDGs Killing

किश्तवाड़ जिले दे कुन्तवारा इलाके दे मुंजला धार आहले उच्चे फ्हाड़ी जंगली इलाके च आतंकवादिएं ग्राम रक्षा समिति वीडीसी दे 2 सदस्यें गी जंदी संझां अगवाह करियै उंदी बेरैहमती कन्नै हत्तेया करी दित्ती। आकाशवाणी दे जम्मू संवाददाता दी पोर्ट मूजब, मारे गेदे वीडीसी सदस्यें दी पंछान नजीर अहमद ते कुलदीप कुमार दे तौर पर कीती गई ऐ। एह दौनें वीडीजी अपने मवेशिएं गी चराने लेई जंगलै च गेदे हे जिसलै आतंकवादिएं उनें गी अगवाह करियै उंदी हत्तेआ करी दित्ती। जैशे मोहम्मद आतंकवादी संगठन कन्नै जुड़े दे कश्मीर टाईगर्स नांS दे गुट नै इनें हत्तेआएं दी जिम्मेदारी लैती ऐ। लेफ्टिनेंट गवर्नर मनोज सिन्हा, मुख्मन्त्री ओमर अब्दुल्ला ते नेशनल कांफ्रेंस दे प्रधान डाक्टर फारुक अब्दुल्ला होरें बी इस आतंकवादी हमले दी सख्त निंदेया कीती ऐ। सोशल मीडिया दी इक पोस्ट राहें एलजी होरें नसीर अहमद ते कुलदीप कुमार गी श्रद्धांजलि भेंट कीती ते सारे आतंकी संगठने दा खात्मा करने दा सरकार दा संकल्प पही दोहराया। मुख्मन्त्री ओमर अब्दुल्ला ते नेशनल कांफ्रेंस दे

प्रधान डाक्टर फारुक अब्दुल्ला होरें आखेआ ऐ जे इस चाल्ली दिआं घटनां, जम्मू-कश्मीर च स्थाई शांति ब्हाली दे जतनें च बड्डी रुकावट न। उनें सोगी परोआरें कन्नै हमदर्दी जताई ऐ। तोआई सनातन धर्म सभा किश्तवाड़ नै अज्ज इस घटना दे बरोध च किश्तवाड़ च इक दिनै दे बंद दा आह्वान कीते दा ऐ।

<><><><><><>

J&K Budget Preperation

जम्मू कश्मीर दे वित्त विभाग नै माली ब'रे 2025-26 लेई बजट तैआर करने दी प्रक्रिया रम्भी दित्ती ऐ। कल जारी कीती गेदी औपचारिक अधिसूचना च सब्बनें प्रशासनिक विभागें, मैहकमे दे प्रमुखें बजट कंट्रोलिंग अफसरें ते डीडीओ-एं गी निर्देश दित्ता गेआ ऐ जे ओह बजट दे अंदाजे तैआर करना शुरू करी देन। 2024-25 लेई नमें सिरेया तैआर अंदाजे गी बी एहदे च शामिल कीता जाहग। इस पूरी प्रक्रिया गी चुस्त-दरुस्त बनाने लेई सब्बनें मैहकमें गी डीडीओ स्तर पर शुरूआती तैआरियां पैहली नवम्बर तगर पूरी करने ते मैहकमे दे प्रमुखें दे स्तर पर तैआरियां 15 नवम्बर तगर पूरी करने दा हुक्म रसाल कीता गेआ ऐ। बजट सरबंधी खीरी प्रस्ताह 20 नवम्बर थमां पैहले पैहले वित्त विभाग गी जमा करोआया जाना लाजमी होग। वित्त विभाग नै बजट आली इस व्यापक कारवाई गी सैहयोग देने लेई तफसीली दिशा निर्देश उपलब्ध करोआए न।

<><><><><><>

President

राष्ट्रपति द्रौपदी मुर्मू होर अज्ज नमीं दिल्ली च केन्द्रीय सतर्कता आयोग सीवीसी दे सतर्कता जागरूकता सप्ताह समारोह गी संबोधत करडन। हर ब'रे सरदार वल्लभ भाई पटेल हुंदी जयंति आले हफते गी सतर्कता सप्ताह दे तौर पर मनाया जंदा ऐ। इस ब'रे एह आयोजन 28 अक्तूबर थमां 3 नवम्बर तगर कीता गेआ ते एहदा विशे-सार हा "मुख्य दी खुशहाली लेई सत्य निष्ठा दी संस्कृति"। सतर्कता जागरूकता सप्ताह दे कन्नै केन्द्री सतर्कता आयोग आसेआ त्र'ऊं म्हीनें दा निवारक सतर्कता अभियान बी आयोजित कीता जंदा ऐ जेहदे च केन्द्र सरकार दे सब्बै मंत्रालय, मैहकमे ते संगठन शामिल हुंदे न। एह अभियान 16 अगस्त थमां 15 नवम्बर तगर आयोजित कीता जा'रदा ऐ।

<><><><><><>

Shah Terror Policy

गृह मंत्री अमित शाह होरें आखेआ ऐ जे सरकार तौले गै आतंकवाद खलाफ लड़ाई गी बल देने लेई आतंकवाद रोधी राष्ट्री नीति ते रणनीति लेइयै औग। कल नमीं दिल्ली च राष्ट्री जांच एजेंसी- एनआईए आसेआ आयोजित आतंकवाद-रोधी सम्मेलन दा उद्घाटन करदे होई शाह होरें प्रधानमंत्री नरेन्द्र मोदी हुंदे नेतृत्व तैहत पिछले इक दहाके दरान सरकार आसेआ सक्रियता कन्नै कीते गेदे हीलें पर लोS पाई। उनें आखेआ जे पिछले 10एं ब'रें दरान मुख्य च आतंकवाद खलाफ लड़ाई लेई इक तगड़ा तंत्र विकसित कीता गेआ ऐ।

<><><><><><>

Railway Special Trains

भारती रेलवे नै छठ पूजा आहले पर्व परैन्त श्रद्धालुएं दे रश गी दिक्खदे होई 500 शा मती विशेष रेलगडिडयें दी बवस्था कीती दी ऐ। छठ दे मगरा अपनी—अपनी सरबंधत थाहरें पर परतोने आहले लोकें दी सखाल लेई एह रेलगडिडयां अज्जै थमां चलाइयां जा करदिआं न। अज्ज रेलवे आसेआ 164 विशेष रेलगडिडयां चलाइयां जा'रदिआं न। एहदे मगरा कल 160 विशेष रेलगडिडयां चलाने, 10 नवम्बर गी 161 विशेष रेलगडिडयां चलाने ते 11 नवम्बर गी 155 विशेष रेलगडिडयां चलाने दी योजना ऐ। पैहली अक्तूबर थमां लेइयै 30 नवम्बर तगर रेलवे नै कुल 7 ज्हार 724 विशेष रेलगडिडयां चलाने दा ऐलान कीते दा ऐ जदके पिच्छले ब'रे इंदी गिनतरी 4 ज्हार 429 ही।

<><><><><><>